


Traspaso di mando na AAA N.V.

Aeropuerto a bisa ayo na James Fazzio y a yama bonbini na Joost Meijs



ORANJESTAD (AAN): Diaranzon anochi tabata tin un ceremonia special na e US Check In Building na Aeropuerto Reina Beatrix. E anochi aki a probecha pa expresa palabranan di agradecimento na e mericano James Fazzio cu durante 5 aña a ocupa e funcion di Chief Executive Officer y na mesun momento a yama bonbini na e siguiente CEO, e hulandes Joost Meijs. MC di e anochi tabata Hendrik Croes, PR di AAA NV kende a introduci Mr. Fazzio pa duna un discurso di despedida den presencia di Gobernador Boekhoudt, Promer Minister Wever-Croes, Minister Dangui Oduber, Minister Andin Bikker, coleganan di Triple A y di Schiphol International, partners, invitadonan special y prensa. Fazzio a expresa na un forma ameno con su nombramento pa bira CEO na Aruba a inicia na New York

unda e prome advies tabata pa e corta su cabey. El a bisa cu ta masha contento con e añanan a bay unda el a traha di un bon manera cu su staff, board members y tambe cu Gobierno. A gradici tur hende pa e support. James Fazzio a laga sa cu el a traha ariba tereno di 'airport management' 30 aña y Aruba mester ta hopi orguyoso pa e hendenan cu ta traha na aeropuerto dia aden dia afo. Den su opinion, e trabao por ta no ta perfecto, pero e ta wordo bon haci y esey kiernen excepcional. "Mi ta hopi orguyoso di e personanan cu ta traha aki nan", a expresa. Finalmente, el a desea Joost Meijs hopi suerte. Nan tabata den bon contacto den e ultimo añanan y vooral den e ultimo simannan. E ta kere cu Meijs ta e 'right person' y cu e lo haci un tremendo trabao.